

MEJE PO CARTE COPIYA PABLO TATINA, TESALONICA TOMARAPIWI TATINATSI

Meje yabara poxonae Pablo tamropata pitaba xua tatina
pomonaetha pomonaes Tesalónica tomarapiwi

1 ¹Xan, Pablon, iru Silvano, iru Timoteo, barapoyobe pan, barapo carte pacata tinatsi. Pacata tinatsi paxam pomonaes Tesalónica tomarapiwi pamxaem pomonaes painya nejumlah cowuntsiwixae Jesucristo. Paxam pomonaes pam pomonaes painya neyawa jinompaewi Nacom, pon Waxa, xua matautano Jesucristo, pon jiwu Pecanamataxeinaein. Barabu Nacom, Waxa, iru Jesucristo, pon jiwu Pecanamataxeinaein, paca yawena xua juntu coyene weiweinaya painya nejinompaewa tsane xuano beta xanepanaya juntea painya nejinompaenexa.

Meje yabara xua Pablo yabara paeba xua Tesalónica
tomarapiwi pinae beta jume cowunta

²Pacata tsipaebatsi Nacomtha, pajan tsaibi Nacomtha: “Nacom maisa pajuntu coyene weiweinan xua daxita Tesalónica tomarapiwi beta jinompa, pomonaes pecajume cowuntsiwi”, pajan tsaibi Nacomtha. ³Pajan tsaibi Nacomtha: “Pata Taxam, Nacom, maisa barapo Tesalónica tomarapiwi bichocono cajume cowuntsiya cata exana dubenanaebiya. Matautano, bichocono necaantobexae daxota ayapusya cata nacuita dubenanaebiya. Maisa bichocono barapomonaes wunaewateiba xua Jesucristo pia pepatopeicaewanexa tsane, pon Pata Tanecanamataxeinaein”, pajan tsaibi Nacomtha. ⁴Paxam pomonaes painya nejumlah cowuntsiwi pam Nacom. Bara payaputan xua Nacom bichocono paca antobe, yawa caena bayatha paca itapeta pia piamonaes paca exanaetsi. ⁵Poxonaes Nacom pia pecapanenebiyae diwesi jume paca tsipaebatsi jopa saya meisa u pata jume. Jame apara Nacom pia Pejumope

tunaxu tatsi pia peayapusu itorobi coyenewatha tatsi pana yawena, xua pata cueicueijejewa. Barapo diwesi bara xaniwaicha jume cowuntatsi xua barapo diwesi bara pexainyei jume. Bara beta payaputaneme xua bara beta pajinompan painya itutha xua pata paca ajuntucoyenesu exanaenexatsi xua iru juntu coyene xanepanaya painya nejinompaenexa.

⁶Paxam paexanaponame icha paichin xua pocotsiwa paexanaponan. Matautano beta paexanaponame icha ichi poxonae beta exanapona pon jiwu Pecanamataxeinaein. Bequein ichamonae atene paca exana painya nejume cowuntsixae Jesucristo, ichitha barapo diwesi awiya juntu coyene weiweinaya pajume cowuntame. Barapo rejuntu weiweinae coyene Nacom pia Pejumope tunaxu tatsi paca cata. ⁷Baxuan painya neexanaexae daxota ichamonae pomonae pejume cowuntsiwi Jesucristo, pomonae Macedonia nacuapiwi, barapomonae exana pocotsiwa paexaname. Iruru baxuan exana pomonae Acaya nacuanpiwi. ⁸Jesucristo, pon jiwu Pecanamataxeinaein, pia pecapanenebiyae diwesi jume pacueicueijam ichamonaetha. Barapo diwesi Macedonia nacuapiwi iru Acaya nacuapiwi jume tane. Jopa meisa barapo nacuabepiwi bara apara daxita nacuanpiwi iruru jume taneru. Daxita barapo jiwu paca yabara yaputane xua painya nejume cowuntsiwa Nacom. Daxota jopa panantawenonaeyino xua paca yabara paebatsi ichamonaetha. ⁹Nama barapomonae pana neyabara paeba xua paxam panententa weyataeya wabame. Matautano barapomonae paca yabara paeba xua pinae paxam ibo nacomun po ibo nacomun copiya wuna pajainteibame pabebam painya nejume cowuntsixae Nacom. Matautano paca yabara paeba xua bapoxonae patamropatarucupame xua pata taexaname Nacom pia petanacuichiwa tatsi, pon yatsicaewa pepa Nacom, pon ataya tsitecaeya asu pepoponaein. ¹⁰Matautano barapomonae pana netsipaeba xua pinae paxam Jesus pawuna ewatame xua pepatopeicaewa peitaboco wetsica. Barapon Jesus Nacom Pexanto tatsi, po Pexantoxae Nacom asu exana petupaey coyene cuiru weya. Barapon Jesus naca napaeba exanaena Nacom beya, poxonae Nacom copatsina xua jiwu bichocono peraxa jubebinchi abe peexanaexae.

Meje yabara po coyeneya Pablo tanacuita Tesalónica tomarapiwi

2 ¹Patamonae paxam pomonae pam pomonae iru painya nejume cowuntsiwi Jesucristo icha paxan paichin. Payaputaneme xua tapaca siwa ponaewatsi baxua wuna pata cayawenaexaetsi. ²Poxonae Filipos tomaratha paponan, barapomonae abe pana exana. Yawa tsumu jumeya pana tsipaeba. Bequein barapomonae baxua pana cana exana ichitha payaputaneme xua Nacom pana yawena tapata catsipaebinxatsi barapo Nacom pia pecapanenebiyae diwesi jume. Baxua paexanan xua jopa juntu deideijeya paca tsipaebichi barapo diwesi bequein

barapomonaē pana jume matawenta. ³Poxonaē paca tsipaebatsi Nacom Pejume Diwesi jopa apara paca tsipaebichi po jume xua jopa xainyeyo xua po jume pejumexaei. Matautano jopa paca tsipaebichi po juntu coyene wajuntu coyene abeya naca tsipaeba. Matautano jopa paca muxujainyabichi xua daxota abe painya neexanaenexa. ⁴Nama Nacom patsita juntu coyene xanepanan xua xainyeya pata tacueicueijeixae. Daxota Nacom pana neitoroba xua pata tapaebinexa pia pecapanenebiyae diwesi jume. Apara jopa baxua paexanaeinyo xua daxota jiwi pata taneweyataenexa. Jame apara baxua paexanan xua Nacom pata taneweyataenexa. Barapon pana nejuntu coyene yaputane xua poxonaē paexaneiban. ⁵Paxam bayatha payaputaneme xua jopa paca tsipaebichi po jume ba jiwi piraichi jume wunaeya paeba xua bepa pia weyataetsi. Matautano payaputaneme xua jopa pacueicueijanyo pata paratixichi. Nacom bara pana tane xua jopa baxua bara paexanaeinyo. ⁶Jopa bapana paichichipaeinyo xua jiwi wunaē pata tanejainchiwa, xua poxonaē metha bequein bara barapomonaē pam, ichacuitha xua poxonaē bequein ichamonae iru. ⁷Bequein paxan pana itacupa xua pata caitorobiwatsi, bequein bara Cristo pia peitorobi jiwi tatsi pan, daichitha jopa paexanaeinyo barapo coyene. Nama apara saya bewayo paca yayawenaponatsi, icha be pocotsi coyeneya petsiriwa ichi poxonaē pia pexui bewayo wichiya yayawenapona. ⁸Bichocono paca antobetsi, daxota paichichipan xua pata paca catsiwatsi Nacom Pejume Diwesi. Jopa meisa xua poxonaē daxota barapo coyenewa, bara yawa daxita muxuna paca yawenatsi daxita pata juntu coyeneintha. iBara jopa juniya pata paca antobewatsi! ⁹Patamonae pam, paxam pomonaē iru painya nejume cowuntsixae Jesucristo. Paxam payaputaneme xua bichocono panacuitan pata xeinaenexa pocotsiwa panantawenonan xua pata nabanaewanexa. Jopa juniya panacuiteibinyo matababintha, yawa merawinthano. Daxota jopa panantawenonaem xua pana catame xua pocotsiwa pata nantawenonaewa pata jinompaewanexa. Jopa paichipaeinyo xua paca nacui matowa xeina exanatsi poxonaē paca cuidubatsi Nacom Pejume Diwesi.

¹⁰Paxam pomonaē painya nejume cowuntsixaemxae Jesucristo pana yaputaneme iru Nacom pana yaputane xua juntu coyene xanepanaya pata jinompaewa painya xantha daxita carepaya paxamtha. Matautano Nacom patsita juntu coyene xanepanan, xua penatsicuentiwa jopa bapon patsita xeinaeinyo. Daxota ichamonae jopa pana neyabara paebiyo xua abe pata pacata exanaewatsi. ¹¹Matautano payaputaneme xua paca itorobatsi xua beta pajinompame. Matautano yawa payaputaneme xua paca juntu tsacabatsi xua xanepanaya painya nejinompaenexa. Matautano bara payaputaneme xua daxita paxam paca cui matateicatsi xua poxonaē bichocono paanthuthutanem tsaibi xua abe painya nepacata exanaexae

ichamonae. Daxita barapo coyenein bara paexanan icha be pocotsi coyeneya coxiyan cana ichiya exana pia pexuitha. ¹²Paca itorobatsi xua bewa beta pajinompae, icha pomonae Nacom pejume cowuntsiwi ichi xua bewa beta jinompae. Baraxua paexande poxoru Nacom paca wun duba piamonae painya paca exanaenexa xua painya nebaru itorobinexa tsane jiwi Nacom pia peitorobi nacua beicha tatsi. Nacom pia peitorobi coyenewa xua jiwi peitorobi coyenewatsi bichocono peitupanae coyenewa.

¹³Matautano paxan Nacomtha patsipaeban pajanje: “Nacom maisa pajuntu coyene weiweinan xua Tesalónica tomarapiwi cajume cowunta poxona patsipaeban jinya jume diwesi. Barapomonae nanta xeina xua po diwesi patsipaeban barapara jinya jume diwesi. Jopa nanta xeinaeyo xua barapo diwesi apra saya jiwi pia diwesi”, pajan Nacomtha. Xaniwaicha barapo diwesi apra Nacom Pejume Diwesi painya paca cana exanaexae xua icha juntu coyene painya nexainaewa pomonae painya nejume cowuntsixae Jesucristo. ¹⁴Patamonae pam. Ichamonae atene paca exana pomonae painyamonaxae. Baxua paca cana exana, icha Judea nacuapiwi ichichi pomonae pejume cowuntsiwi Cristo Jesús. Daxita barapomonae ajuntucoyenetane exainchi pomonae piamonaxae pomonae judiomonaxae. ¹⁵Caena bayatha judiomonae pia pamo susato jiwi tatsi juteba, pomonae Nacom pia peitorobi jume pepaebiwi tatsi jutebatsi. Cotacaya icha judiomonae Jesús pon jiwi Pecanamataxeinaein tupa exanadutatsi naetotha. Matapainya anoxuae icha judiomonae pana yotaba pata penacaetutsi bo weya. Pocotsiwan barapomonae exana Nacom baxuan jopa tsita xanepanaetsi. Barapomonae nacana exana pomonae daxita jiwi pia peitafaetabi jiwichi. ¹⁶Paichichipan xua patsipaeban Nacom Pejume Diwesi pomonaetha pomonae jopa judiomonae naexanaeyo xua iru Nacom pecapanenebiyaenexa tsane bequein judiomonae pata tanejume itawetsiwatha tsane poxona patsipaeban Nacom Pejume Diwesi. Poxonae judiomonae barapo abe peexanae coyene pana tsiexana bapoxonae opi duta wetsiya exana daxita po peabe coyenewan xua bayatha itacupatsi xua eexanapona. Daxota anoxuae nama matapainya Nacom bichocono anaepana barapomonaetha. Nacom juntucuru peraxa juba exanaena barapomonae, penatsicuentsexae abe peexanaexae bapontha.

Meje yabara xua equeicha Pablo besiwa ponaena Tesalónica tomarapiwi

¹⁷Paxam pomonae patamonae pam, poxona bequein paxan taju paca cuenta enatsi, xua saya bara caetotha jopa imoxoyo paca taetsi, ichitha paca yabara nanta xeineibatsi pata paca itaxaneibixaetsi. Bichocono paichichipan xua pata paca cataewatsi. ¹⁸Paxan matowa paichichipan xua caewa pata paca siwa ponaewatsi. Xan, Pablon, ichacuitha matowa

nanta xeineiban xua paca siwa poneibinchi. Ichitha caurimonae pia pentacaponaein tatsi, Satanás, pana necui yancababeiba. ¹⁹Ichichipan paca siwa ponatsi poxoru paxam pana necana exaname xua pajuntũ coyene weiweinan. Barichi paxam pomonae pana necana exaname xua pawũnae ewatan. Barichi paxam pomonae pana necana exaname xua matowa payabara paeban pocotsiwa xua paexanan poxonae paca cuidubatsi. Poxonae Jesucristo pon jiwí Pecanamataxeinaein equeicha caewa patopeicaena bapontha paca yabara paebinchi po coyene xua paxam pana necana exaname. ²⁰Xaniwaicha paxam pomonae pam pana nejuntũ coyene weiweina cana exaname. Matautano paxan pomonae pana necana exaname xua paca yabara wũnae jainchinchi Jesucristo peitabaratha poxonae bapon peitabaratha tatsi paca barũ umenaeinchi beta painya neexanaexae.

3 ¹⁻²Jopa pana itacũpaeyo xua awiya equeicha pata ewatsiwa xua pata paca yabara yaputaewa tsainchi. Daxota juntucuru pananta xeinan xua paitoroban Timoteo pon jume cowũnta Nacom painya pia paca necataenexa tsanebe. Matautano juntucuru pananta xeinan xua Silvano compa paecaeinbe Atenas tomaratha. Timoteo paitoroban, tsipei bapon beta tanacuita Nacom nexa. Barapon Timoteo pana yawena poxonae pacueicueijan Cristo pia pexeinya jume diwesi tatsi. Bapon Timoteo itacũpatsi xua ajuntũcoyenyapusũ paca cana exana. Matautano itacũpatsi xua paca juntũ cui tsacaba exana xua awiya mataropeichiya painya nejume cowũntaponaenexam Nacom. ³Bapoxonae dapon aibi tsane paxam jiwana pon ajuntũcoyenefaetabiya jume cowũnta xua ichamonae abe peexanaexae bapontha. Paxam bayatha payaputaneme xua daxota bewa ichamonae atene naca exanaena wajume cowũntsixae Jesucristo. ⁴Matautano poxonae cataunxuae paca barũ enatsi, paca tsipaebatsi xua daxota bewa ichamonae naca atene exanaena poxonae nacata abe exana. Bara baxua bayatha exana barapomonae icha be pocotsi coyeneya bayatha paca tsipaebatsi, xuano payaputanemeno. ⁵Tsipei xan jopa neitacũpaeyo xua equeicha taewatsiwa xua tapaca yabara yaputaewa tsainchi, daxota Timoteo itoroban. Bapon inta paca yainyabiya jei: “¿Bara awiya pajume cowũnta dubenanaebiyame Jesucristo?” jei. Baxua beyaputaein tajunuwixae xua caurimonae pia pentacaponaein tatsi pon jiwí pejuntũ coyene jũjũtsin paca cui jũjũtsipa xua abe painya neexanaewa tsane. Bapoxonae pocotsiwa xua pata tapacata nacuichiawatsi jopa paca yawenaetsipae xua jopa xapain painya nejume cowũntsixaem tsipae.

⁶Ichitha bayatha bapon Timoteo caewa patopa xua bara werena xua painya tomara werena. Bapon yabara pana tsipaeba, bichocono jume xanepana xua pinae awiya pajume cowũnta dubenanaebiyame Jesucristo. Matautano yabara pana tsipaeba xua pinae nantiya pana naantobe

tsurubenanaebiyam. Matautano yabara pana tsipaeba xua pinae pana neyabara antobeya nanta xeiname matauta xua pinae bepana netaename, icha paichin xua bena tapaca taewatsi tsainchi. ⁷Patamonae pam, paca tsipaebatsi bequein ichamonae painta ayapube exana yawa pana atene exana, ichitha pajuntũ coyene sadũjan poxonae pajume tan xua pinae beta pajume cowũnta dubenanaebiyame Jesucristo. ⁸Poxonae paxam awiya beta pajume cowũnta dubenanaebiyame Jesucristo, pon jiwi Pecanamataxeinaein, baxua pajuntũ coyene sadũjan pata jinompaewatha Nacom nexa. ⁹Anoxuae pana itacũpa xua pata jeiwa: “Nacom maisa pajuntũ coyene weiweinan Tesalónica tomarapiwi beta necajume cowũntsixae”, pata jeiwa. Paxam pomonae pana nejuntũ coyene weiweina cana exaname poxonae Nacom patsipaeban. ¹⁰Matacabintha, merawinthano Nacomtha pacata wũqueibatsi. Nacom pawũqueiban xua bara pata necopatsinexa xua pata tapaca casiwa ponaenexa tsainchi. Paichichipan xua pata paca yawenaewatsi xua beta painya nejume cowũntsiwa Jesucristo pocotsiwa yabara pacata seica xua painya yabara neyaputaewa Jesucristo.

¹¹Paichichipan xua Nacom pon Waxa irũ Jesús pon jiwi Pecanamataxeinaein pana yawenaena xua pata paca casiwa ponaenexatsi. ¹²Matautano paichichipan xua Jesús, pon jiwi Pecanamataxeinaein, paca cana exanaena xua equeicha bichocono toxeinchiya paxinaponaename peantobe coyenewa xua nantiya painya nenaantobexaem tsane. Matautano paichichipan xua barapo peantobe coyenewa daxita jiwi painya tsita xeinaenexa icha paca ichichi xua bichocono paca antobetsi. ¹³Matautano paichichipan xua Nacom pon Waxa, painya nepaca cana exanaenexa xua bichocono painya nejuntũ coyene xanepanaewa. Matautano paichichipan xua Nacom pon Waxa bichocono ajuntũyapusũya paca cana exanaena. Bapoxonae paxam bichocono Nacom tsita jũntũ coyene xanepanaeinchi. Bapoxonaeno jopa patsita natsicuentisim tsane abe painya neexanaexae bapontha. Barapocotsi jũta coyene awiya paexanaponaename beya poxonae Jesús pon Wanacanamataxeinaein, piamonae barũ patopeicaena daxita.

**Meje yabara po jũntũ coyeneya bewa jiwi tajinompae
Nacom po coyene xua Nacom tsita xanepanatsi**

4 ¹Patamonae pam anoxuae jume daunweya paca jeichi, yawa paca itorobiya jeichi: “Tsipei Jesús pon jiwi Pecanamataxeinaein, pana necayawa popona daxota paca itorobatsi. Pocotsiwa paca cuidubatsi paxam bara paichinde. Bayatha paca cuidubatsi xua bewa equeicha mataropeichiya payajuntũ coyene jinompaem po jũntũ coyene xua Nacom tsita xanepanatsi. Matautano anoxuae equeicha matowa paexanaponde barapo coyenein, po coyenein xua anoxuae paexanaponaename”, paca jeichi.

²Paxam payaputaneme po pecuidubiwan paca cuidubatsi apara barapo pecuidubiwan Jesús pana itoroba, pon jiwi Pecanamataxeinaein. ³Xua jame Nacom pocotsiwa ichichipa xua paxam bewa bichocono juntu coyene xanepanaya pajinompam Nacom peitabaratha xua daxota ichamonae patsita itapeinya xeiname xua bara Nacom painya neantobe jiwi pam. Jopa panasi cui exana dubenanaebiyaeinde ichamonae pia seurixitha tatsi. ⁴Pebin bewa yaputaena xua beta cuicuinaena piseuritha po coyeneya xua Nacom tsita xanepanatsi xuano xua jiwi tsita xanepanatsi. Matautano bapon bewa baru cui itura jinaena piowa pia peantobexae. Daxita barompaya pebiwi pam bewa iru bara paichim tsane. ⁵Barichi barapo pebin jopa bewa exanae tsane barapowatha po coyene xua saya pia penaquenta exanaetsi. Tsipei ichamonae pomonae jopa Nacom yaputaeyo, barapomonae abe nanta xaina nawita xua yabaxi yabara xua penaquentsiwa yabara. Barapo coyene painya xoba paexaname. ⁶Jopa paexanaeinde barapo abe peexanae coyenewatha pontha pon iruru pejume cowuntsin Nacom. Jopa bewa papichim barapon piowa tatsi. Icha baxua paexanaetsipame pon jiwi Pecanamataxeinaein bichocono atene paca cana exanaetsipa abe painya neexanaexae. Bayatha barapocotsiwa paca muxuwetatsi. ⁷Nacom jopa naca wun dubiyo piamonae wanaca exanaenexa xua abe waexanaponaewa tsane. Jame apara Nacom naca wun duba xua juntu coyene wunaeya wajinompaenexa Nacom peitabaratha tatsi xua daxota ichamonae tsita itapeinya xeinatsi xua bara Nacom pijimonae tatsi wanaexanaenexatsi. ⁸Pon jume itaweta po coyene xua ichun pepichiwa yabara xua ichun piowa tatsi, apara bara bapon jume itaweta Nacom pia pecuidubi coyenewa tatsi. Jopa apara jume itawetsiyo pebin pia pecuidubi coyenewa tatsi. Barapon Nacom paca cata pia Pejumope tnanxu tatsi xua painya yawa jinompaenexa.

⁹Po peantobewa xaina pomonae pejume cowuntsiwi Nacom, xua nantiya caemonae penantobewa, xan jopa nantawenonaeyo xua yabara tapacata tinaewatsi barapo coyene. Tsipei Nacom pia coya paca cuiduba po coyene xua nantiya painya nenaantobewam tsane. ¹⁰Bara baxua paexaneibame xua paantobe tsurubenanaebiyam daxita pomonae jinompa Macedonia nacuatha, pomonae pejume cowuntsiwi Nacom. Ichitha paxam patamonae pam painya nejume cowuntsiwixae Nacom, paca itorobatsi xua awiya mataropeicha paantobe tsurubenanaebiyama equeicha matowa. ¹¹Bichocono paichichipare xua painya neexanaewa xua po coyene meje: Juntema parubenanaebiyama, xua jopa pana najume matsontsonoba dubenanaebiyam. Matautano painya xoba patsipaebibame ichamonaetha po coyenein barapomonae bewa exanae. Matautano barompaya painya penacuichiwan pana natsiexana dubenanaebiyama icha be pocotsi coyeneya bayatha paca tsipaebatsi.

¹²Icha barapocotsiwa paexanaename ichamonae pomonae jopa Nacom pejume cowuntsiwi paca baru cui itura jinaena xua bara beta painya neexanaexaem. Matautano jopa panantawenonaem xua ichamonae panwcame pocotsiwa xua panantawenoname.

**Meje yabara poxonae Jesucristo pon jiwi
Pecanamataxeinaein equeicha caewa patopaetsica**

¹³Patamonae pam, paichichipan xua painya neyaputaewa po coyene pexainyei coyene, xua petupaewi yabara. Matautano jopa paichichipaeinyo xua be wecoyeya pajinompame icha be ichamonae ichi pomonae jopa pejume cowuntsiwi Nacom. Barapomonae be wecoyeya jinompa jopa xanepanaya pewnae ewatsixae po coyene xua poxonae petupaewi equeicha asu tsane. ¹⁴Waxainchi jume cowuntatsi xua Jesús tupa naetotha xuano equeicha Nacom asu juina exana. Icha Nacom pexanto cana ichi, waxainchi jume cowuntatsi xua Nacom bara cana ichi tsane pomonaetha pomonae bayatha werapa. Barapomonae pejume cowuntsixae Jesús, poxonae werapa asu jujuina exanaeinchi xua Nacom exanaena. Nacom barapomonae baru jujuinya exanaeinchi Jesús, xua Jesús pemuxuna caponaenexatsi Nacom pexainya beicha.

¹⁵Daxota paca tsipaebatsi pocotsiwa xua Jesús pana netsipaeba pon jiwi Pecanamataxeinaein. Yabara paca tsipaebatsi xua pomonae cataunxuae asu jinompa poxonae patopaena pon jiwi Pecanamataxeinaein barapomonae copiya jopa jujuinya exanae tsainchi xua Jesús pecaxibinexa tsainchi athabeicha. Jame copiya matha asu jujuina exanaeinchi pomonae bayatha werapa. ¹⁶Jesús pon jiwi Pecanamataxeinaein patopaetsica peitaboco wetsica. Barapo mataqueitha jiwi jume taena peajumeyapusu itorobi wawaiwa, xuano xua cueicueijei matatsunpiwi pia pentacaponaein tatsi, xuano xua trompeta jume busi xubina Nacom pia trompeta tatsi. Bapoxonae pomonae Cristo jume cowuntatsi xua pomonae bayatha yacui werapaeya othopa bapomonae copiya asu jujuina exanaeinchi. ¹⁷Bapoxonae cotacaya waxainchi pomonae cataunxuae asu jinompatsi, pomonae wajume cowuntsiwi Jesús naca cayawa muxuna caetucaetutsiya caponaena pomonae copiya pewerapaewi. Daxita barapomonaetsi Nacom naca caponaena xua naca caponaena tsaquinaebowatha xua Jesús pon jiwi Pecanamataxeinaein wacaxibiyaenexa tsainchi athabeicha. Baxoteicha ataya tsitecaeya daxita waxainchi Jesús pon jiwi Pecanamataxeinaein, naca baru jinompeibina. ¹⁸Daxota barapo jumetha caemonae nantiya pana najuntu coyene tsacabare xua painya neyaputaewa tsane, po coyene xua pewerapaewi yabara.

5 ¹Patamonae pam, jopa nantawenonaeinoyo xua yabara pacata tinatsi matabi, yawa dapae yabara xua poxonae Jesucristo

pepatopeicaewa tsane. ²Bayatha payaputaneme xua equeicha patopeicaena pon jiwi Pecanamataxeinaein. Matautano payaputaneme xua bapon patopaetsica poxonae xapain jopa nanta xeinae tsainchi, icha pon pecaibin ichi xua jemeicha patopa merawitha. ³Poxonae jiwi jei tsane: “Maisa juntea jinompatsi tsipei daxita wunae tsurucuae”, jei tsane, bapoxonae patopaena jemeicha po dapaetha poxonae jiwi bichocono atene exanaeinchi. Jiwi jopa itacupae tsainchi xua panenebiyaena barapo peatenewa weya. Jiwi atene exanaeinchi icha yabayo ichi xua bichocono bewa atene tsane xua pexuyo poxonae naexanaena. ⁴Patamonae pam, paxam jopa dapocotsimonae pam, pocotsimonae jopa jume cowuntsiyo Nacom. Poxonae equeicha patopaetsica, pon jiwi Pecanamataxeinaein jopa pana nabenaecaem tsane, icha jopa be ichiyo poxonae jiwi nabenaeca xua pecaibin jemeicha patopa. ⁵Paxam pomonae Nacom payabara yaputaneme. Daxota beta painompame icha be ichamonae ichi, xua mataqueitha beta taeya jinompa xua pentha petsuncuaexae. Waxainchi jopa dapomonaetsi xua icha be ichi pomonae abeya jinompa jopa pejume cowuntsi jiwixae Nacom. Barapocotsimonae be pomonae poxonae jinompa pequireiwatha, jopa beta jinompaeyo pequirei tsuncuaexae. ⁶Pomonae jopa pejume cowuntsiwichi Jesucristo barapomonae jopa tsaca jinompaeyo xua pewunae ewatsinexa Jesucristo pia pepatopeicaewa tsica tsane. Barapomonae be pocotsimonae xua maita, xua jopa itacupaetsi xua penacosabiwa. Ichitha jame bewa waxainchi wacoutha barompaya juntu coyene coxonaetsi xua tsaca wajinompaewa poxonae wunae ewatatsi Jesucristo pia pepatopeicaewa tsica tsane. ⁷Pomonae ba xua maita, bara merawi maita. Iruru pomonae ba cupatsi peatsaxa mera, bara merawi cupatsi. Daxita barapomonae jopa xapain Jesucristo wunae ewatichi. ⁸Ichitha waxainchi wajume cowuntsixaetsi Jesucristo, daxota bewa juntu coyene coxonaetsi xua tsaca jinompatsi xua wawunae ewatsiwa Jesucristo. Waxainchi xanepanaya bewa beta jume cowuntichi Nacom. Matautano bewa beta nantiya naantobetsi. Barapo coyenebe naca juntu coyene yaitata xua jopa abe exanaetsi, icha soldadomonaepin ichi xua nayaitata penaintotha xua nantacari xatata xua pecawatsiyainwatsi dejonatha. Barichi waxainchi bewa jume cowuntsiya wunae ewatichi xua Nacom naca capanenebiya tsane. Barapo coyeneya naca yaitata xua abe waexanaeyainwa icha soldadomonaepin ichi xua nantasipa yaitata penain yoreitha xua peantasipabe exanaeyainwatsi. ⁹Nacom jopa naca itapetsiyo xua wanaca atene exanaenexa wanatsicuentiswaxae abe waexanaexae bapontha. Saya apara naca itapeta wanaca capanenebiyaenexa xua Jesucristo wanaca tsitupaexae naetotha pon Wanacanamataxeinaein. ¹⁰Jesucristo naca tsitupa naetotha wanaca baru jinompaewa tsane pia nacuatheicha, bequein waxainchi bayatha werapatsi, yawano ichacuitha

bequein waxainchi awiya asu jinompatsi, poxonae bapon patopaetsica. ¹¹Daxota paxam bewa awiya daxita nantiya pana najuntu coyene tsacabim. Matauta bewa nantiya pana najuntucoyenesu exanaem beta painya nejume cowuntsinexa icha paichiponaem xua anoxuae paexanapname.

**Meje yabara xua Pablo muxuweta pomonae
Jesucristo pejume cowuntsiwichi**

¹²Patamonae pam, paca muxuwetatsi xua pabarū cui itura jinare pomonae painya xantha Nacom tanacuitatsi xua pomonae paca matakapona. Barapomonae paca muxuweta xua Jesucristo pon jiwī Pecanamataxeinaein pecui itorobixae abe painya neexanaeyainwa. ¹³Bewa barapomonae beta pabarū cui itura jinaem peainya cui jiwixae. Matautano bewa bichocono paantobem xua barapomonae betiya painya nepaca mataxeinaexae. Daxita pam nantiya juntema jinompa pana naexande.

¹⁴Patamonae pam, paca itorobatsi xua jume daunweya pamuxuwere pomonae afaetabi xua penacuichiwa. Pajuntu coyene cui tsacabare pomonae juntu coyene junuwiya jinompa ichamonae atene peexanaexae barapomonaetha. Matautano payawende pomonae jopa ajuntucoyenesuya jinompaeyo Nacomtha. Bewayo payawende barapomonae xua jopa painya neaitaconaewam.

¹⁵Painya xoba ichamonaetha abe pata exaname, xua copiya abe pia pacata exanaexae. Seicaya jame incane beta xanepanaya daunweya pajujateibare xua nantiya painya nenata exaneibinexa, xuano iru daxita jiwino.

¹⁶Barabu tsitecaeya pajuntu coyene weiweina dubenanaebiyama. ¹⁷Daxita matakabi Nacomtha patsipaebeibare matowa. ¹⁸Daxita pocotsiwa pacata exana bequein jopa pacata wunaeyo, ichitha awiya barapocotsiwan yabara Nacomtha patsipaebeibare, pajam tsaibinde: “Nacom maisa pajuntu coyene weiweinan xua pata tana neyawenaewam poxonae bequein painta daunwei tsaibi”, pajam tsaibinde. Poxonae baxuan papaebame bichocono Nacom tsita xanepanatsi painya neexanaexae pocotsiwa Nacom ichichipa Cristo Jesús pia paca baru jinompaexae.

¹⁹Jopa paitawetsinde Nacom pia Pejumope tunaxu tatsi poxonae paca itoroba pocotsiwa bewa paexanaem. ²⁰Jopa pajume itawetsinde po diwesi xua ichamonae paeba pomonae Nacom Pejume Diwesi pepaebiwi. ²¹Incane pajume taema daxita po diwesi xua barapomonae paeba icha bara metha xaniwaicha po diwesi pona Nacom weya. Saya paitapere po coyene xua pexainyeiwa. ²²Daxita po coyenein peabe coyenein panaitemare xua jopa painya neexanaewam abe peexanae coyenein.

²³Bara Nacom, pon jüntema jinompa naca exana, barabũ barapon paca jüntũ coyene ayapusũ exanaena xua jũpa paca cana exanaena icha bapon ichi xua jüntũ coyene xanepana. Matautano barabũ Nacom paca jüntũ coyene xanepana exanaena painya nejinompaewa tsane bapon nexa xua jopa painya nexainaewam penatsicuentsiwa xua abe painya neexanaexae bapontha. Barabũ Nacom beta paca jumope eenaena, yawano xua painya jüntũ coyenewa, matautano xua painya pepon xua Jesucristo nexa pon Wanacanamataxeinaein xua beya poxonae bapon patopaetsica. ²⁴Nacom ponxae xua paca wũn duba pia paca exanaenexa piamonae tatsi, bapon xainyeya pepaebin. Matautano bapon exanaena pocotsiwa xua bayatha yabara paca tsiwũnae muxu duta.

Meje yabara xua Pablo najume wetsiya paeba

²⁵Patamonae pam, painta Nacomtha wũqueibare.

²⁶Antobeya painta jacobare daxita pomonae patamonae pomonae Jesucristo pejume cowũntsiwichi.

²⁷Xan paca itorobatsi tsipei Jesucristo, pon jiwi Pecanamataxeinaein neitoroba. Paca jeichi: “Barapo carte painta yorobare daxita pomonaetha pomonae Jesucristo pejume cowũntsiwichi”, paca jeichi.

²⁸Jesucristo, pon Wanacanamataxeinaein, barabũ paca yawena pia paca necaantobewaxae.

Baja Pablo, irũ Silvano, irũ Timoteono ponbe necueyatabe.